



English Version



Mei 31, 2021 -Isnin

## Siaran Media

MREM adalah sebuah perkhidmatan pengedaran siaran akhbar profesional oleh BERNAMA, Pertubuhan Berita Nasional Malaysia, sebuah pembekal kandungan berita yang terkemuka kepada media tempatan dan antarabangsa..

[< terperinci >](#)


- ◆ PIPOC 2007
- ◆ LANGKAWI INTERNATIONAL DIALOGUE
- ◆ IKIM :THE ROLE OF ISLAMIC
- ◆ KL OIC HEALTH
- ◆ PERAK ROYAL EVENT
- ◆ DEVELOPING 8 (D8) MINISTERS MEETING ON FOOD SECURITY

[lagi](#)


### MEREALISASIKAN IMUNITI KELOMPOK MELALUI GERAKAN KOMUNITI

Monday 31/05/2021

**BACHOK, 31 Mei (Bernama) --** Pengisytiharan penutupan penuh sektor sosial dan ekonomi ataupun dikenali 'total lockdown' oleh kerajaan adalah keputusan tepat.

Ia bukan sahaja dijangkakan boleh mengurangkan kadar kebolehhajangan, menurunkan kes Covid-19, tetapi juga boleh menjadi usaha untuk merealisasikan imuniti kelompok secara sistematik melalui penyertaan komuniti.

Apa itu imuniti kelompok? Menurut Kementerian Kesihatan Malaysia (KKM), imuniti kelompok atau herd immunity adalah keadaan di mana agen jangkitan tidak dapat memasuki atau tersebar dalam kelompok disebabkan sebahagian besar daripada anggota masyarakat mempunyai imuniti dan terlindung daripada penyebab jangkitan tersebut.

Sudah pasti berkaitan dengan pandemik Covid-19, cara terbaik untuk mencapai imuniti kelompok adalah melalui kesedaran dan pelaksanaan vaksinasi.

Memandangkan tiada lagi pergerakan bebas dibenarkan sepanjang lockdown nanti, usaha untuk merealisasikan imuniti kelompok mungkin lebih mudah untuk dilaksanakan. Bagaimanakah caranya? Kita pernah didedahkan bahawa peratus rakyat yang tidak hadir dalam janji temu pemberian vaksin adalah tinggi.

Mereka termasuklah dari kalangan warga emas dan kelompok tercirir yang lain.

Kita boleh membuat andaian bahawa mereka mungkin berhadapan dengan masalah pengetahuan tentang kepentingan vaksinasi, cakra keperluan pendaftaran, kemaskini tarikh janji temu serta mempunyai masalah berkaitan pengangkutan.

Apa sahaja sebabnya, ruang dari lockdown ini membolehkan kerajaan mencapai imuniti kelompok dengan memanfaatkan gerakan komuniti. Inilah masanya penggerak komuniti boleh lebih membantu.

Mereka adalah terdiri daripada pemimpin atau ahli organisasi dalam komuniti seperti penggawa, penghulu, pengerusi dan ahli pelbagai peringkat organisasi dalam komuniti, atau apa sahaja nama mereka.

Termasuklah juga para pemimpin agama dalam komuniti dan badan bukan kerajaan (NGO) dalam komuniti.

Rasionalnya, mereka bukan sahaja kenal ahli komuniti masing-masing, malah hubungan mereka yang akrab membolehkan usaha penyampaian maklumat berkaitan vaksinasi berlaku dengan lebih berkesan dan tidak terjebak dengan diayah yang prejudis.

Seterusnya mereka boleh membantu komuniti untuk akses kepada Pusat Pemberian Vaksin (PPV) berhampiran.

Penggerak komuniti dianggap sebagai bersedia untuk memikul tugas ini kerana lazimnya mereka mempunyai senarai ahli komuniti masing-masing.

Jika tiada sekalipun, inilah masanya untuk mempraktikkan konsep 'data terbuka (open data)', iaitu mereka dibenarkan untuk menggunakan dan menilai kembali data dari pangkalan data sedia ada seperti e-kasih dan sebagainya.

Dalam masa yang sama, data dari pangkalan data tersebut juga boleh dibersihkan, ditingkatkan dan seterusnya boleh digunakan untuk aktiviti lain di masa hadapan kelak seperti usaha intervensi pengurusan kemiskinan dan peningkatan kesejahteraan komuniti.

Namun, jika konsep data terbuka belum sesuai untuk dilaksanakan, maka inilah masanya untuk memperkasakan penggerak komuniti dengan ilmu pemetaan komuniti.

Mereka mungkin boleh dipertimbangkan untuk dibenarkan bergerak dalam komuniti masing-masing sepanjang tempoh lockdown ini dan sudah pasti dengan koordinasi serta prosedur operasi standard (SOP) yang ketat.

Jika ada ahli komuniti yang mempunyai masalah berkaitan pengangkutan untuk ke PPV, maka inilah masanya semua pihak untuk berganding bahu membawa ahli komuniti ke PPV.

Misalnya, agensi kerajaan berkaitan, penggerak di peringkat DUN atau parlimen, boleh menyediakan pengangkutan untuk tujuan vaksinasi.

Begitu juga dengan penyertaan dari pihak industri, mereka juga boleh menjadi pemangkin kepada usaha yang digerakkan oleh penggerak komuniti.

Misalnya perkhidmatan teksi, perkhidmatan seru-pandu (e-hailing), dan pengangkutan awam lain.

Mereka boleh menyediakan perkhidmatan sama ada secara percuma, bayaran minimum atau dengan bantuan subsidi.

Syukur, perkara ini telah pun dilakukan oleh beberapa pihak dengan SOP tertentu, dan usaha ini perlu diperluaskan lagi.

Inilah juga masanya pihak industri menunjukkan sokongan penuh kepada usaha kerajaan untuk merealisasikan imuniti kelompok dengan pelbagai pendekatan atau konsep.

Mungkin boleh menggunakan konsep CSR kebersamaan bersasar untuk menggalakkan lagi penyertaan rakyat dalam program imunisasi vaksin Covid-19. Sudah pasti, manfaatnya juga akan kembali kepada semua.

Justeru, sempena dengan namanya sebagai imuniti kelompok, adalah wajar ia diterjemahkan dengan penyertaan komuniti melalui gerakan komuniti.

Usaha begini sudah pasti merupakan salah satu tafsiran yang tepat kepada slogan "kita jaga kita", iaitu kesedaran dan tindakan bijaksana bersama dalam komuniti untuk mewujudkan imuniti kelompok.

Penulis Prof. Madya Dr Wan Ahmad Amir Zal Wan Ismail adalah Pengarah Institut penyelidikan dan Pengurusan Kemiskinan (InsPeK), Universiti Malaysia Kelantan (UMK).

**SUMBER: Universiti Malaysia Kelantan (UMK)**

**UNTUK MAKLUMAT LANJUT, SILA HUBUNGI  
Pusat Komunikasi Korporat, UMK  
Nama: Encik Mohd Adzwan Bin Kamaruzaman  
Tel: 0199811719  
E-mel: [adzwan@umk.edu.my](mailto:adzwan@umk.edu.my)**

**Nama: Syarimie Wosley  
Tel: 019 9681001  
E-mel: [syarimie@umk.edu.my](mailto:syarimie@umk.edu.my)**

**--BERNAMA**